



O sin tes ultimis oris dal 2020, chest al è l'ultin articul dal an e a chi al è l'Ostîr in persone, che us scrîf, par dâ a ducj il Bon Finiment e par meti in polse par cualchi zornade la Ostarie, fasint **cuatri cjacaris in libertât su chescj ultins dodis mêis di Osterie**. Meteisi comuts, che no vin premure.

DI DULÀ SCOMENÇÂ?

Dal dîsi che sin rivâts a chest Ostîr ca, che o viodêts inte fotografie fate dal Famei su lis rivis di une muarte dal Stele, a Titian, li de Madone de Nêf. Un Ostîr ingrassât, scjavelât, smavît, che al plate i voi daûr dai ocjâi e al è vistût di neri, ma ancjemò ben pontâts i pît tes lidrîs scritis su la maiute e te acule che e je su la mascarute. E dutcâs, un Ostîr che al ponte la voglade lontan. Podarès dî che lontan al è viers il 2021, che al scomence doman, ma mi pararès une cagade e **no vuei colâ in cheste stupide idee umane di dividi il timp in agns che e je utile dome par processâ lis informazions e meti adun la nestre vite, ma plui di li no à valôr**. Si sverarìn doman e si darin il Bon Principi cui stes fastidis che o nin a durmî usgnot: cu la int che si inmale, che e mûr, che e vuaris a fature, che e piert il lavôr, la voie di stâ dongje e volê ben, che no ûl la vacine, che e crôt a ogni bufule, che e à simpri pronte une tristerie in sachete, cu lis libertâts gjavadis, i dirits smenteâts e la sdavasserie, la ignorance, lis cjativeriis che a paronin simpri di plui e dapardut. Oh, sî, nol è dut che al va in vacje, chel po no, ma che la strade cjapade e sedi chê, al è dificil di dineâ. Par chest **la voglade di chê fotografie mi va intun lontan che nol è tant intun cîl dal mont temporâl, ma ben intun lontan di robîs di fâ, ideis di**

meti inpins, alc di biel di meti dongje doman e parcè che al inten me, di storiis di contâ. Contecurte, tal cheste idee di doman, e je al prin puest, e al è un progjet che **o ai simpri intundût come un puest di Resistance.** No tant pe leterature, o pe lenghe furlane, che a son dome il mieç che o doprìn, ma plui chê altri in chel concet calvinian di **tignî di cont e salvâ lis robis bielis, che no son “Infier”, e che bisugne fâlis durâ il plui pussibil.** Contecurte e je une di chestis robis. Ven a stâi che cheste e je la prime robe di dî. Che o sari chi, cun ducj chei de nestre clape, ancje doman.

NUMARS E CONTIS

Ce numars vino vût, dilunc di chescj ultins mêis? Ben po... **o vin publicade la conte numar 1000, fate di ducj,** plui o mancûl, che nus à contade il personaç di **Lupo Manarie,** che di sigure lu cjatarêis inmò ator pe Ostarie e che nus insegne a cjapâ lis robis cun mancûl serietât, plui fantasie e parcè di no, cuntun pôc di matucel che mâl nol fâs. E dopo vê tocjât il numar mil, cu lis contis, **o sin rivâts ae numar 1055, par un totâl di 150 contis, 241005 caratars e 68994 peraulis. Une medie di 2273 caratars e 460 peraulis par conte.** O vin vût 26 autôrs diferents e 2 contis coletivis. I plui prolifics, in bande dal Ostîr e dal Famei (passe 20 contis par om), a son stâts **Marisa Gregoris, Laurin Zuan Nardin e Galliano di Buenos Aires.** Il super comentadôr di chest an al è stât di gnûf **Lussian di Varian,** che guai a no vêlu. A proposit, se o vin pierdût par strade cualchi conte che nus vês mandât e no vin publicât, tornait a mandâle. Ogni tant, intune Ostarie, si piert alc e cuissà dulà che al va a finîle. E soledut, mandaitnus contis, che cussì o tachin a jemplâ il camarin. Ancje parcè che lu vin ben svuedât, chest an, publicant dutis lis storiis de buinegnot di **Ivano Urli,** e chês dai Contecurte Day vieris, che ancjemò no vevin metudis sù. **Su la nestre pagine Facebook o sin rivâts a 790 plasidôrs** e forsì di cheste bande si podarès fâ ancje miôr, a stâi plui daûr. La nestre **Liste di Contecurte,** che e je stade la vere novitât dal 2020, e je rivade, plui o mancûl, a **180 di lôr** (e us visin une volte in plui che al è inmò



cualchidun che no si è inacuart che lis mail a rivin te caselute “promozioni” o che inmò nol à fracât il leam di conferme par iscrivisi).



EVENTS E LETURIS

Si sa, o vin fat pocje robe, ma alc o vin fat. Di events dal vîf o sin lâts indevant cu la colaborazion cul Sportel pe Lenghe Furlane de Basse e il concurs Vôs de Basse, e **a chi podês cjatâ un struc dal spettacul di leturis fat dilunc de premiasons**. E propite in sierade dal an alc che al podeve jessi une presentazion la Lunari di Prissinins al è devantât **il video “Cirint la Lune tal Stele”**, che us invidin a lâ a viodi, se no altri par i bieî puescj e la pâs che si cjate ator di chês bandis e par lis cjantis des **ConFusione** che o sintîs daûr. O vin fat **il Contecurte Day 2020, lu vin clamât CovidCurte Day** e si sin inventâts, in grazie de nestre super Sartore Informatiche (che lu à ancje vinçût), lis versions audio des Contis, di maniere che si podedin ancje scoltâ lis storiis. O vin metût adun ancje **une pagine cul storic di ducj i events di Contecurte**, che no je inmò finide, ma e sarà tra lis primis novitâts a rivâ. O cjatarês dentri une vore di materiâl, fotografiis e libruts di scjamâ, ma no vin inmò finît e nus covente ancjemò un moment.

INIZIATIVIS E IDEIS

Il domini totât dal an al è stât **“La Conte dal Mês”** un regâl che o vin fat a ducj i iscrits te Liste ai 16 di ogni mê s che al veve dentri:



1. **Une conte lungje inedite** che o ai scrit suntun teme furlan di chel mê sielzût in cunvigne cu la Coghe.
2. **Un articul lunc de Coghe Fuguline**, che al contave di tradizions furlanis
3. **Un dissen brut ma in teme** fat pe cuvierte dal lavôr.
4. **Sorpresis di ogni sorte** (contis, musiche, curts, zughets, lotarie, dissens dai Piçui Aiutants, ghost track no anunciadis... di dut!) metudis adun cun mateçs informatics e grafics de Sartore

O pues za dî - ancje cence consultâ la Coghe e la Sartore - che **la esperience de Conte dal Mês no si ripetarâ tal 2021**. Come che o ai za dite ai iscrits, al è stât biel, **al è saltât fûr “un libri” che o crôt di buine cualitât, al è stât un diari dal an e de vite in Friûl dilunc chescj mê s unics te storie de umanitât**, ma al è stât ancje alc che nus à cjapât une vore di timp e creativitât. Viodarìn cemût movisi par podê magari dâ a chest lavôr une publicazion su cjarte, ma par il prossim an o pensarin a alc altri. E propit par chest, **us invidi a iscrivisi ae Liste** (basta viodi sul sît e meti dentri la vuestre mail) par ricevi ogni setemane i inzornaments de Ostarie.



Une altre iniziative e je stade chê des **Lotariis**, che o podês cjatâ **tes diretis de pagine Facebook**. A proposit... la ultime e je stade doi dîs fa e ve chi i numars che a àn vinçût... Us mandarai la mail par visâus pene che o ai un moment. Cun di plui, al è di ridi, doi libris ju àn vinçûts propite la Coghe e la Sartore, ma ju

vevin za, si che duncje, preparais voaltris cui numars di riserve che a àn za dit che ju cedin a cui che al ven dopo.

Simpri dilunc dai timps dulà che nus vevin sierât in cjase, o vevin tirade fûr ancje la idee di **Scoltecurte**, che no à vût masse adesions ma al è stât biel lei cualchi conte par telefon, a cualchidun. E dopo, o vin metût il piç ancje tal spettacul di **Suns Friûl**, che o ai presentât insieme cu la Coghe, e un piç di Ostarie al è dentri di un pâr di sodisfazioni personâls, come la vitorie tal **Zâl par Furlan e la menzion tal Premi de Percude** di Manzan (lavôrs metûts adun insieme cu la Coghe e Carli Pup).

COLABORAZIONS E JUTORIS



La colaborazion che o vin tacade plui di resint e je ancje la plui gruesse, in fat di contis. **O vin un cjantonut inte riviste La Panarie**, dulà che o puartarin su cjarte lis contis, magari pescjant alc di gnûf o alc di vieri ma smenteât. Comprait la riviste, se la cjatais, che dentri a son une vore di articui interessants (par talian) e altris piçulis bielîs robutis par furlan.

O vin sostignût il **Concors par Contis Curtis Vôs de Basse** e anzit, **al è pene jessût il bant par la edizion dal prossim an** e jo, come simpri, o invidi ducj i contecurtârs a partecipâ, propit parcè che un concurs al à valôr sedi pe cualitât, sedi pal numar di contis che a rivin, e se no i din la poie noaltris de Ostarie, no sai cui che al varès di fâlu.

E in ultin, o aidi ringraciâ chei che nus àn dât une man e nus àn sostignût cuant che o soi lât a domandâ premis pe nestre Lotarie, o visibilitât pes nestrîs iniziativis. Lu fâs invidantus a:

- **scoltâ Radio Onde Furlane**, a scomençâ di usgnot, che e je une seradone di fin dal an.
- **comprâ i libris de Kappa Vu**, se o vês di regalâ o lei alc in marilenghe, e no dome parcè che a son i miei e chei dal Checo
- **comprâ lis robis de Friûl point**, e no parcè che a son furlanis, ma parcè che a son fighis.
- scjamâ il disc gnûf disc di chei doi mats dal Cjantor e dal Poete de Ostarie insieme cun Floramo e **Gli autostoppisti del magico sentiero** che si clame **Pasolini e la Peste** e o ai scoltât dut il timp intant che o scrivevi chestis riis.

Altri e altris no mi ven tal cjâf e di sigure mi stoi disementeant cualchidun. Puartait pazience.

Bon. Al è dut, par chest an, e o profiti par dî che la Ostarie e restarâ in polse par lis primis dôs setemanis dal an. **Us saludi a ducj di bande di ducj**, Ostîr, Famei, Coghe, Sartore, Massarie, Piçui Aiutants, Berlon, Cramâr, Dorondon, il Cjantôr e il Poete. **Bon Finiment e Bon Principi!**